

111 年全國語文競賽客家語朗讀文章高中學生組（南四縣腔）

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个屏在雲背；知節制个海風，驚生份个吹一陣又恬一陣，出海口个海湧，慢板慢板仔在該激啊激仔¹。無人出入咁个魚市場裡背，就單淨留等，幾葩仔²孤栖个電火，還過，幾臺仔推啊推仔³个抽風機。

魚市場外背闊闊个停車場這片，擎花擎花仔⁴停等幾臺自用車，還毋想睡个駛車仔人，有人帶等罐頭來餵野狗、也有人帶等釣槓來邀月光釣魚仔。魚市場該片遠遠个停車場脣口，幾下个緊夜緊有元氣个後生人，載等掛有大喇叭个音響，同車後斗撒向天、三臺車仔比比恬，在該咚滋咚滋⁵尋月光共下跳舞。

右手片个音樂聲撓啊佢个腳底癢癢，毋過，左手片騎等過个兩臺奧多拜，錫著佢个目光。佢踈等佢等个身影，行上兩百八十公尺長个笨鯊橋，想去看啊，掛等頭燈个兩個網魚人，係愛網麼个魚仔？月光也探頭出來咁，一浪一浪个水紋，在月光下看啊清

清楚楚，一張魚網、兩個網魚人，掖網、收網，撈起來个係一網个月光。雖然，連魚屎都無，毋過，佢等還係有講有嗆，佢想，佢等怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，也認同佢个想法「係啊，係啊！」緊應緊大聲，佢緊聽緊有趣味。毋過，同佢看真來，該「係啊，係啊！」个聲說，怕係河壩水分海湧打轉來，抑係海湧激上河壩水个聲啊！

毋多知仔，就分佢行過笨鯊橋咁。橋這片，日時頭分人箭啊盡迷頭个自行車，這下聚概一列列仔企好、企正，在月光下恬靜。光華華个路燈下，無人上下咁，就單淨一隻揸等螺殼个揸殼蟹，對白沙堆探頭出來又屏倒轉去，對路脣趟過來又趟倒轉去，自家在月光下搞措目屏窟。佢企在路脣，看揸殼蟹、看流流流流个河壩水，在共樣个月光下，盡像分佢看著咁，頭擺，該一大陣笨鯊入港時，客家打漁人佢等面項个笑容。

¹ 激啊激仔：音 gieb a gieb e'；液體來回晃動貌。

² 幾葩仔：音 gi` pa` e'；幾盞。

³ 推啊推仔：音 kog a kog e'；此為形容機器轉動的聲音和狀態。

⁴ 擎花擎花仔：音 lo fa' lo fa' e'；稀疏間雜著其他花色的樣子。

⁵ 咚滋咚滋：音 dung` zii` dung` zii'；形容電子音樂的節奏聲。

編號 2 號

【夜鷹】邱一帆原作

毋記得在哪時節開始，佢輒常對斷烏¹，聽著天頂高「追佢啊追佢，追佢啊追佢」个聲，一聲又一聲，一直對半夜喊到天光，該刺耳吵人个叫聲，正會對佢个耳公項消失。盡多年前，佢第一擺在屋下聽著該恁尖恁利个聲，實在盡佇毋著，趑趑行出屋頭前去看。該烏烏像細雞仔个身影，在天頂高飛啊飛仔、迂啊迂仔。有時節，毋知係飛到瘰吔，抑係麼个，會頓腳在屋頂高。老鼠色个鳥身，「追佢啊追佢，追佢啊追佢」个聲，還係一聲喊過又一聲。

該係麼个鳥？聲骸仰會恁吵人？佢共快走入屋肚去，盡認真上網路項去尋資料，尋上尋下，正發現該種形仔个鳥仔，名就安到「夜鷹」。恁起來感覺著盡奇怪！早早在 1861 年就有人在臺南發現佢个影跡，離這下有一百五、六十年吔，早都算係臺灣特有亞種个鳥仔，對山項到平洋、對莊下到都市，一哪仔都看得著佢个身影、聽得著佢个叫聲。做麼个佢食吔四十零歲，正第一擺在南庄聽著、注意著恁呢个鳥聲、知著恁呢个鳥名呢？佢感覺著自

家盡壞勢啊！壞勢自家無好好仔認識，一直生活在自家身邊个鳥仔。

每年新曆二月到八月，係臺灣夜鷹尋鳥嫲个繁殖期。七個月恁長个時間，每隻鳥公就想愛尋著自家理想个對象——鳥嫲，互相培養感情，相好下一代。乜一直愛等到孵生後代，細鳥仔會飛、離開鳥公鳥嫲个保護，正算完成傳宗接代个使命。故所，在這期間，鳥公對入夜到天光，會緊喊出「追佢啊追佢，追佢啊追佢」這吵死人个聲骸，來號地盤，嚇走其他个可能个入侵者。也因為夜鷹个聲骸壞聽又大聲，有盡多愛恬靜驚吵个人，就恁呢分夜鷹吵啊睡毋得，謔啊望毋得夜鷹共快消失核！

佢知夜鷹个聲骸盡吵，吵啊人食睡就毋得，尋鳥嫲个繁殖期間，確實影響著人个生活。毋過，夜鷹毋係無半息好²，佢對環境也有一定个平衡³作用。夜鷹个嘴擘啊又闊又利，會搶食蟲仔，毋管係在暗暗个天頂高抑係光光个路燈下，水蟻仔、金龜仔、草蟻仔還有盡多蟲仔，就係厥个食物、厥个好味緒。因為夜鷹个尋食習慣，多多少少也維持吔該兜蟲仔个數量，保護著生態个平衡。

¹ 斷烏：音 ton' vu'；入夜。

² 無半息好：音 mo' ban xid' ho'；一無是處。

³ 平衡：音 pin' fen'；指一個物體的運動維持不變（亦即沒有加速或減速）的狀態。

編號 3 號

【芋荷葉个智慧】謝錦綉原作

這幾年長透會在報紙、電視新聞看著，魚仔肚筍有食著各種塑膠落仔。

現下因為塑膠落仔便宜又利便，毋管燒个、冷个、冰个，總下用塑膠落仔裝，無論上山下海，大隻細隻，用過就丟¹核，大家慣序恁呢無限制个使用塑膠落仔。

三不二時看著新聞報導，海鰵死在海脣，研究人員剖開肚筍，發現海鰵毋係發病死，係因為食忒多人類丟啊海裡背个塑膠落仔，無法度消化正死核。海鰵歸身仔塑膠粒仔个毒性，其他个海魚仔也共樣有；人又捉魚仔來食，這毒性又轉到人類本身來。結果就恁呢輪迴，魚仔源頭減少，大環境污染，人類自家也係大食物鏈其中之一，健康當然大受影響。

今年正月過核年，偃對嘉義上來臺北寮一兩個月；吾姊歇新店山頂，有所在好種菜，每擺有菜好摘，佢就坐車仔拿來分偃。

第一擺拿著佢用紙落仔裝等个青菜，偃先放冰箱，等到愛煮該下，正打開紙落仔看，啊噯！正知紙落仔裡背還用三層芋荷葉

包等，毋係用塑膠落仔包等。偃就想：「阿姊呀，你正經跔毋著時代也？這下還有麼人用芋荷葉包東西？」偃暗暗在該噏阿姊。

無想著，先拿出一種菜食，還無食个菜照原旦个芋荷葉包轉去，繼續放冰箱。過兩日菜食核，去拿第二種菜時，打開芋荷葉，包在葉仔裡背个青菜，還本本萋萋；到這下，偃正知芋荷葉恁好用。

這下个時勢，科技進步盡遽，大部分人總係認為新个發明過進步，舊換新，舊東西大家就丟核。

毋過，毋管新也舊，大家總愛想過長久、想過遠兜，該兜毋會綿、毋會歿个垃圾，緊留緊多，留到最尾，地球總會分垃圾揸核；到該下，人無法度歇地球，後代子孫也毋知愛歇去哪仔正好？

芋荷葉毋單淨做得保存青菜、魚仔、肉，比塑膠落仔效果過好。東西食核，同芋荷葉丟核，佢歸啊泥裡背，自然綿核，就會變做肥料養分，全無打爽。芋荷葉無毒性，毋會污染環境，顛倒分地球淨俐，分人類健康，這係頭擺人个智慧，愛記得正好。

¹ 丟：音 tiau^ˋ；丟掉

編號 4 號

【老鼠仔】張捷明原作

老鼠仔有盡多種：大逵老鼠、逵地龍¹、錢鼠、大老鼠、細老鼠……，大逵老鼠在田坵裡背絡食，盡好食番薯，盡大隻、又有肉，係頭擺人無豬肉食該下，盡重要个肉類來源之一。

再講逵地龍，佢歇在地泥下，盡好打窿，蒔田个水田，在收冬該下種番薯雜作，係有逵地龍，等到交春蒔田，田脣輒常會漏水，穩水田²嘎變漏水田。山田个田坎過高，還會慢慢轉田脣，就係老古人言：「大漏漏毋長，細漏漏燥塘。」意思係講，山魚塘係有老鼠窿，大窿漏大水，會緊張，再仰仔無閒，也會跔等抽間³去塞起來，毋過，細窿漏細水，無閒个耕種人就會想，一息息仔定定，就無愛搭佢，想講天光日正來補，結果天光日又毋記得，等到想著，魚塘水早就燥核吔。

大逵老鼠會嘍番薯，人就捉老鼠仔食，算係一報還一報打平過。逵地龍盡得人惱，毋過，做得分人想著這句老古人言教子孫，乜算佢還有兜功勞。

另外，還有錢鼠，錢鼠實在就得人惱，歇在人屋下个圳溝裡背、同烏疏疏个所在，細細隻無幾兩肉，還一身蓬臭，係現代阿姆盡驚个小動物。毋過，大人乜蓋生趣，偏偏同佢安名錢鼠，怕係講，這家人盡有錢，穀倉正會有盡多穀分錢鼠食，好得人類知好畜貓仔打老鼠，係無，金山銀山就會分佢食空。

毋過，這下天年倒貶，除核大逵老鼠、逵地龍、錢鼠，還加一種寵物鼠。寵物鼠無天敵，連貓仔就毋係佢个對手；今个人畜个貓仔，嘎毋敢打老鼠仔，更毋敢打寵物鼠，在人个屋下，緊畜老鼠仔服侍佢做阿公，緊又試著對貓仔過意毋得，故所乜用飼料畜貓仔做寵物，毋單淨毋使寵物貓打老鼠，還同老鼠仔放共下，表示貓鼠世紀大和解，人類第一功。毋過，麼人會知貓仔係仰仔想个呢？

二十世紀後，除寵物鼠，世界又加一種新品種个老鼠仔，毋使飼料，毋會屙屎，淨淨俐俐又毋會嚙人，日日放啊手巴掌惜日惜夜，還做得分人使嘴，佢安到鑪鼠。巴掌捉等厥圓身在桌頂一鑪，手指在厥一片耳公一點，就做得指揮電腦，指揮世界，指揮地球，難怪十二生肖，老鼠仔早就打第一，貓仔嘎紙頭無名、紙尾無姓，連同老鼠仔比大細个資格就無。

¹ 逵地龍：音 bun ti liung^ˇ；鑽洞鼠。

² 穩水田：音 vun` sui` tien^ˇ；能良好保持水量的水田。

³ 抽間：音 cu` gian^ˇ；積極、抽空。

111 年全國語文競賽客家語朗讀文章高中學生組（南四縣腔）

編號 5 號

【阿婆个烏鷄】曾菁怡原作

歌莊下樹仔多、田多、鳥仔多，係天時好，打早就做得看著電線頂高俾共下像還無睡醒个斑鳩仔，抑係歸陣仔嘍嘍嘎嘎在路脣絡食个屋簷鳥，有時節還看得著在天頂飛來飛去个鷄婆。有一種鳥仔歸身鳥毛烏疏疏，淨在翼胛尾同鳥尾有一息息仔白毛，目珠、嘴同該瘦夾夾个腳係黃色个，安到烏鷄。佢總係跳啊跳、跳啊跳，毋多知仔就帶佢跳入有吾婆个回憶裡背。

阿婆係樸實个莊下婦人家，溫和恬靜，為著家庭一生人就像迂迂轉个極樂仔無時間。天還無光就跣床煮豬菜分豬仔食；天矇光就揸等衫褲去河壩洗衫；衫褲晾好又過趕緊去菜園落肥、淋水。除核這兜，還愛煮三餐、畜頭牲、做田事……。放晝該下阿婆正有好轉擺，佢盡好坐在門口个藤椅頂高，目絲絲仔享受微風吹在面頂个鬆爽。

有一日晝，阿婆正坐下來準備轉擺，目珠影著外背个竹籬笆下有一團烏疏疏个東西在該停動，行兼過去看，發現係一隻還毋會飛个烏鷄鳥子。阿婆同佢捉在手頂，對頭看到尾；對尾看到腳。一下揸啊揸厥頭那頂同面頰卵；一下掀開厥幼嫩个翼胛，搵

過來搵過去，像細人仔抓著生趣个玩具，看啊眼晶晶仔無眨目。

阿婆想起閒間仔有一隻頭擺阿叔畜鸚哥个鳥籠仔，就決定同這隻鳥子畜起來也。每朝晨，阿婆手面洗好就去看籠仔裡背个飼料還有無？愛過換水無？一有閒就同鳥籠仔拚到淨俐淨俐。食飽晝，阿婆就會同藤椅徙到籠仔脣，俾等籠仔教烏鷄講話：「天光也！」、「食飽也無？」、「大家好！」、「正來奈」……。日見日，該烏鷄看著人也會講阿婆教佢个話也。

無想著，有一日朝晨籠仔門毋知仰仔分人打開也，裡背个烏鷄也毋知去哪仔？阿婆兩隻手捧等飼料，頭磬磬仔企在籠仔脣，久久正接受烏鷄毋見核个事實，嚟啲仔講：「恁打爽，畜恁久也！」該个鳥籠仔又收入去閒間裡背囡也。

這拜日阿婆做對年，阿姆交代愛歸老屋祭拜。燒金該下，幾下隻烏鷄在竹頭下跳啊跳、跳啊跳，有時節擎頭這看該看，背尾就飛到竹林裡背，淨伸風吹過竹葉噁噁疏疏个聲。毋知阿婆這下有同佢講話个烏鷄無？

111 年全國語文競賽客家語朗讀文章高中學生組（南四縣腔）

編號 6 號

【網出阿姆个背影】徐熏琪原作

網路就像係一個洋洋洋洋無邊無脣个大海，網等人同人之間个距離、網等世界个脈動、網等日常生活。佢，就像係一尾魚仔，輒常洄入網裡背遊遊野野，緊洄緊深、緊洄嘎緊遠……。

還記得讀國中愛開學个前幾日，阿姆拿等一支手機仔講愛分佢用。一開始，佢懷疑係毋係耳公有聽爭差，等到撻著手機仔，佢歡喜到佇毋著，心肚恸想總算有一支手機仔也！正想愛仰仔好好來使用這手機該下，就聽著阿姆講：「分你手機仔，係方便你同屋下人聯絡事情哦！毋係分你拿來變鬼變怪个，也升國中也，自家愛曉得自重，敢做得著？」佢跔等領頭講：「阿姆放心啦！佢用手机仔定著會有分寸个。」

續等幾日過後，手機仔裡背三不時就跳出遊戲、社交軟體个訊息，「阿姆放心啦！佢用手机仔定著會有分寸。」這句話早就變做一陣風，飛到天背遠去也！

網路世界切斷阿姆同佢之間个信任，毋多知仔同屋下人講話个時間緊來緊短，同手機仔相處个時間緊來緊長；搵手做家务个時間緊來緊少，洄入手機仔个時間緊來緊多，佢就像今這下个低

頭族共樣，一旦手機仔拿上手，愛放下手係無恁簡單个事情。

記得有一日食飽夜過後，佢堵好同同學搞等緊張刺激个線項遊戲，阿姆喊佢好去洗碗筷也，佢詐勢無聽著，過無幾久阿姆又過喊加一擺，佢就謹謹仔應：「大細心！每擺就喊佢！屋下淨伸佢一個人也？」無想著這句話深深刺入阿姆个心。阿姆聽著後，恬恬仔就行入灶下去洗碗。佢看著阿姆洗碗个背影，感覺著頭下對阿姆堵堵撐撐嶄然過分，就遽遽放下手機仔同阿姆會失禮，同阿姆手頂个碗筷接來洗。

該暗晡為著這件事睡毋落覺，腦裡背浮出阿姆洗碗个背影，該背影就像一面鏡仔，照等阿姆腰掛背吊个身影，嘎映出佢無老無大个行為；照等阿姆對佢个開容笑面，嘎映出佢對阿姆眼睜睜仔个面目。更深夜靜，佢个反省比夜還過長，經過這擺个事件，正發現著佢个日常生活早都分網路世界縝縝，漸漸仔疏離對屋下人个互動。故所，佢想尋轉阿姆對佢个信任，愛自家要求正確來使用手機仔，學校作業一定愛先做好、搵手做核家務後正使用手機仔，還愛記得同屋下人多多相處，大家和和接接過日仔，該正係盡有溫情个家庭生活。

【挖筍蟲】郭亭好原作

還細時節，爺哀為著愛畜僱等這陣大細，歸日無閒啊迂迂轉，屋下裡背長透伸著僱等這幾個細孬囉仔，長透搞啊癢吔，毋係伏在長凳板項睡，就係在戶檻下睡啊四腳惹天，天生天養，該係僱識行過个童年。

等阿哥過大吔，佢會帶僱等滿田滿畝去拈揚尾仔、打草蝨仔、摘拉杌仔、土番樣這兜來食。該時，屋背有種一大墩个烏葉竹，上莖¹个竹仔暴芽就會有筍蛄來叨筍尾生卵；搞怪个阿哥會帶僱等去扭筍蛄來搞。阿哥扭筍蛄个本事一等壁，佢講愛細義毋好攏著筍蛄，看佢盡力盡力一下就同佢擇下來，畀看著个筍蛄無一隻走得核。佢同扭來个筍蛄用棉線縳等放佢飛，僱等跔等筍蛄走，該線一下長一下短，像放紙鷂个樣，等僱等搞癢吔正同線解²核放佢走。

一擺阿哥嘴豺，帶僱等去尋上莖吔正綻个葉嘎黃核个嫩竹，阿哥講有筍蛄在該仔生卵，裡背會有筍蟲好拈；看阿哥大力挖該

葉黃核个嫩竹，同佢倒拗下來，正經看著筍蟲蠕蠕動，僱等共快跔下去搨拈。歸到屋下，阿哥就將這兜筍蟲放下鑊仔用油煎，僱等企在灶頭脣胲嘔嘔仔³等等，看著該香香赤赤个筍蟲，目金金仔、口涎水險險都會流出來吔！毋過一個人正做得分著幾尾筍蟲嚐等，僱同老弟三兩口就囫淨淨吔，阿哥看著共快過同厥碗裡背个筍蟲分分僱兩個人過願。該下仔，阿哥恁肯分食，僱等嘎無感念阿哥惜僱等个情意，正知好顧嘴空，這下惱起來對阿哥實在盡壞勢。

有一日，隔壁个阿姨來分阿姆請食晝，番綻个阿哥知阿姨毋敢食筍蟲，就挑挑搥射佢，同煎好个筍蟲押入阿姆正煎好个魚仔肚，阿姨覺著係魚卵煞猛食，還緊阿腦講恁好食。尾下老弟無細義嘎講出來，害阿姨共快入去便所裡背翻到嘔嘔滾，該日阿哥就分阿姆扭纏耳公去同阿姨會失禮，還分阿爸罰去祖公牌前跪歸下晝。

這下惱起還細該下，雖然無像這下个人生活恁豐湧，毋過日仔過來盡自在，盡多該下好搞个事情，一息都毋會輸這下細人仔个網路遊戲，僱等在該田坵山排走相逐个腳跡，還深深印在僱个腦膈裡背，係盡生趣个回憶。

¹ 上莖：音 song' guang'；植物莖部開始成熟或老化，此指竹筍太慢採收而老化成竹子。

² 解：音 kie'；鬆開。

³ 脣嘔嘔仔：音 goi' iog' iog' e'；伸長脖子，引頸企盼的樣子。

【花樹下个童年】李宜諭原作

美濃永安老街在美濃河个北片，歸條永安路對東門樓到德勝伯公壇，分做上莊、中莊、下莊，僱屋下歇「花樹下」，係前莊，這仔有南柵門渡船口，係永安老街最鬧熱个地方。

花樹下深深刻印等僱个童年。吾姆 49 年嫁來美濃，就在美濃國小教書，還記得，總會看著佢在操場項教大會舞、在禮堂教民俗舞，還有扇仔舞、篸仔舞、彩帶舞。佢人緣好、手腳溜掠，鄰舍个細妹仔、婦人家都會送佢剪伸个布仔，佢就拿來做蓋鬧¹个衫褲分僱等著，故所，僱等恁多姊妹小學个學生帽、制服、洋裝、裙、褲，大概都係阿姆做个。

吾爸也係先生，佢蓋會帶僱等做童玩，像：雞毛毬仔、銅笏仔²車、竹蟬仔、竹揚尾仔、竹筒假高腳、紙鷄仔。該年代，歸伙房大家共下用一個便所，便所下背係糞缸，看著恁深个糞坑，僱就會頭那昏昏驚種下去³，故所以毋敢入去，阿爸就每早晨載僱等幾個細孬囉仔去學校上便所，一個人一間，屙核共快歸屋下。

還毋曾入學前，僱同大老妹都係跔等阿哥出去奈，去河壩脣灌土狗仔、搞揸目屏窟；去田坵項釣蛎仔；去河壩覓大肚魚；坐

在美濃舊橋頂項看河壩；在伙房裡背竄上竄下⁴；去阿婆个河壩埔菜園搞奈；跋啊鄰舍个圍牆裡背搞扭人仔，鄰舍譴著就會放狗仔出來操⁵僱等，僱等就恁呢練地一身跋牆頭个工夫。

寒天過啊核，美濃河還無麼个水，舊曆二月二伯公生會「做大戲」，係美濃一年一擺做鬧熱个時節，所有嫁啊另勢个歐巴⁶、阿姨、姨婆、姑婆都會歸來永安老街，在親戚屋下歇幾下日，就係愛「看大戏」。在南柵門渡船口个河壩脣，會搭蓋大个戲棚，戲棚下係僱等搞奈个好所在，一陣細人仔也會偷偷仔走啊舞臺後背，偷看佢等化妝、換衫褲。

開始做戲地，除核頭前幾排个老人家坐等看以外，其他人都係企等看，有兜人還會企啊凳仔項。細人仔根本看毋著，阿爸就會同僱等扭啊肩頭項，分僱等看一下過願。毋過，因為看毋識也聽毋識，阿爸就會拿幾角銀分僱等去買食，賣搏灌腸⁷、李仔糖、它碼⁸汽水……个攤仔，生理一等好。僱歐巴屋下就歇在河壩脣，姑婆、姨婆同阿婆就會坐啊歐巴屋下後背，愛下去河壩底个梯排項看戲，僱想，佢等應該都係用聽个吧！「看鬧熱」順續仔共下「打嘴鼓」。

就恁呢，一日又一日，一年又一年，日仔就在無聞中過核，僱等也在搞奈中慢慢仔大也。

⁴ 竄上竄下：音 con song'con ha'；穿來穿去。

⁵ 操：音 cau'；追。

⁶ 歐巴：音 o' ba；姑姑。

⁷ 搏灌腸：音 bog gon qien'；打香腸。

⁸ 它碼：音 ta ma'；彈珠。

¹ 蓋鬧：音 goi nau；很漂亮。

² 銅笏仔：音 tung' gong' e'；鐵罐的統稱。

³ 種下去：音 zung ha' hi；栽下去。

111 年全國語文競賽客家語朗讀文章高中學生組（南四縣腔）

編號 9 號

【舉重仙女】蔡承軒原作

阿美生來拗蠻靚，盡像仙女下凡。

厥爸盡驚阿美路項堵著壞人，就尋來健身教練訓練阿美。一開始覺著阿美會反抗，無想著阿美上咗課以後就好上舉重。過後，阿美一下課毋係在健身房就係去健身房个路項。

阿美進步盡遽，擊个重量緊來緊重。雖然試著盡食力，毋過佢看著自家个進步，乜試著值得咗。有時節練到歸身瘦軟痛，乜盡想偷懶；有時節無細義著傷，乜想愛放棄。每擺阿美愛放棄該下，就會恸著有人講過：「危險係真實存在个，毋過愛驚佢無，係你自家个選擇。」在訓練个過程裡背，佢了解愛看著山頂該恸靚个光景，定著無恸簡單。

一瞞目，過咗幾下年。這下舉重對阿美來講就像啟氣樣仔恸自然，佢想愛做一個舉重運動員，同鍛鍊身體个觀念傳分過多人知。教練試著分阿美參加比賽个時機到咗，阿美無分大家失望，在頭一擺比賽就得獎。佢嘎無一息仔自滿，因為阿美有過大个目標，該就係參加奧運。

每日訓練過後，教練都會陪等阿美共下看優秀選手个影片，

檢查自家還有哪仔愛改進。阿美乜陸陸續續參加比賽，漸漸仔分緊來緊多人認識佢，外背个人同佢安咗一個偏名：「舉重仙女」。

經歷咗千辛萬苦，阿美總算得著代表臺灣參加奧運个機會，這係佢幾下年來个夢想，毋過時間緊逼，佢黏時愛加入訓練，好拿出最好个表現同國家爭光。

在恸多登真人才个奧運場項，無半个人知阿美係麼人，甚至於還有兜仔藐視這個頭一擺來參賽个黃皮膚个細妹仔。毋過，阿美知佢眼下愛做个就係拿出最好个表現，毋使聽人狗呷烏蠅，正經強个人總係用成績來講話。跔等比賽緊進行，就算阿美个分數跔人毋著，佢乜還係煞猛牯齧等牙根，盡遽就來到咗最尾一關个挺舉¹，教練同阿美思量過後打算盡命牯去拚，去試毋識擊過个重量，係講成功咗，阿美會係這屆奧運个金牌得主。

包尾十分無採，阿美落鼓²咗。佢顛倒毋會試著見笑，因為佢知就算落鼓咗，總比無試過正來後悔還過甘願。阿美發誓四年過後愛重新轉到奧運个比賽場項，來同臺灣爭取一塊金牌。

¹ 挺舉：音 ten` gi`；挺舉。

² 落鼓：音 log gu`；日語轉譯，指失敗。

【打窯仔】劉玉蕉原作

打早，就聽著阿婆交代阿姆，去市場斫兜豬肉、買兜薑魚仔歸來，「欸，奇怪！有麼人做生日係無？」問過阿婆正知，係滿姑愛轉妹家，怪毋得阿婆恁歡喜！探著滿姑歸來個時間，佢走去莊頭阿惜姨個雜貨店等，佢頭望望仔緊探。姑丈個車仔毋曾駛兼，佢就走出去攞手吔，姑丈車仔一頓恬佢就跋上車，滿姑嘍等講：「屎肫毋曾坐燒，就愛下車吔，恁大神氣！」知佢歡喜，佢尖入車肚就同姑表姐妹大聲搞起來。

滿姑帶個惹想蓋錫人，每一個人都有一份以外，車仔後斗還有一大布袋個番薯仔，阿婆講：「番薯仔恁多仰結煞，無就來打窯仔好吔，屋背田項個泥，上禮拜正犁過，應該乜燥吔，佢等來打窯仔，愛無？」「好哦！登真哦！」聽著有好搞，佢等黏時就應好。

起窯吔啲，阿爸拗三砵大泥團做門，窯身就尋像厥拳頭恁大個泥砵仔來結，疊高吔還過愛慢慢縮口，幾下到，結到半爛燦就屙下來，「唉，老刀嫲毋利吔，無恁好搵囉！」臨尾還勞攪姑丈搯手，正順順仔結好。窯仔一起好，阿哥就發號命令吔，佢喊佢

同姑表姊妹去拈樵杈，阿姊負責起火、架樵，大阿姊蓋倚勢得得，火畀掌到猛猛猛，紅紅個火尾對泥砵縫項鑽出來，像愛食核人樣仔，害佢等閃啊遠遠遠，無幾久，泥砵親像甜柿仔紅啾啾吔！

「好勢吔啲，樵莫過架吔，火退出來，做得擲番薯入去吔！」阿婆恁呢講。

火炭培開來，番薯就一粒一粒擲入窯仔裡肚。「哇！」表阿哥個擔竿一拓下去，紅紅個泥砵跔等屙下來，堵好奔在番薯項，「建設難，破壞容易」，細人仔輪等拓泥砵，每一個都搵啊歸頭歸面，臨尾還係姑丈來收尾，佢同幼泥掖啊頂頂，用砂耙再頓畀沓¹，頂頂再插一支青，恁呢一息煙都無出吔，正喊佢等去搞。真無簡單結跔來個窯仔，這下看起來就像一個番薯壟呢！

屏人尋毋曾搞罇，遠遠就鼻著香味吔，影著阿姆在該開窯，佢等遽遽圍過去看佢變奇術，阿姆驚怕番薯畀挖綿，細心細意在該定定仔挖，緩緩仔培，香氣錫啊佢等口涎溶溶跌，肚筍乜嘍哩咕嚕緊抗議。田脣項，佢等比比坐，香香個番薯塞歸嘴，天恁清，番薯恁香，在屋背個田項，佢等搞啊斷烏正歸屋。

¹ 頓畀沓：音 dun bi` teb；蹂躪使之緊密。